

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XXXV Blg. 13
Hulyo 7, 2004
www.philippinerevolution.org

Editoryal

Hungkag at mapanlinlang ang 10-puntong programa ng rehimeng Arroyo



Isang malaking panloloko ang ipinamamarali ni Gloria Arroyo na 10-puntong programa. Wala itong ibang layon kundi linlangin ang mamamayan at pagtakpan ang kainutulan ng rehimen na itaguyod ang interes ng nakararaming mamamayan. Hatid nito'y papatinding pagsasamantala at pang-aapi sa mamamayan ng mga mandarambong na malalaking dayuhan at lokal na kapitalista, asendero at burukratang kapitalista. Wala itong ibang idudulot sa mamamayan kundi ibayong kahirapan at panunupil.

Bukod sa mas matatayog at lalong di kapani-paniwalang mga pangako, ang 10-puntong programa ni Arroyo ay walang pinag-iba sa dati nang hungkag na mga pangakong binitawan niya sa kanyang *state of the nation address* noong Hulyo 2003. Alinman doo'y walang natupad. Tiyak na wala ring maaasahan mula sa mga bago niyang deklarasyon.

Patuloy ang malawakang pagkawasak ng mga produktibong pwersa at pagkabagsak ng produksyon. Inaasahang aabot sa P200 bilyon ang depisit sa badyet. Patuloy na lumalaki ang depisit sa kalakalan, ang gahiganteng utang ng gubyerno at panlabas na

**Mga tampok sa
isyung ito...**

Usapang
pangkapayapaan,
nakakadismaya **PAHINA 3**

Chacha, adyenda ng US
PAHINA 4

Ka Argie:
Mandirigmang medik
PAHINA 8

utang ng Pilipinas. Kaya walang mapagkukunan ng pondong panustos sa mga target ni Arroyo.

Mismong ang mga burges na ekonomista ay nagmamaliit sa 10-puntong programa ni Arroyo. Anila, masyadong ambisyoso at walang batayan sa riyalidad ang mga itinakdang target ni Arroyo. Isinasaalang-alang nila ang kasalukuyang pagkalugmok ng ekonomya sa malalaking suliranin. Ang sobrang matatayog na target ni Arroyo, kung tuuusin, ay tanda ng labis-labis ding desperasyong lokohin ang mamamayan.

Kabilang dito ang pangako ni Arroyo na makalikha siya ng 6-10 milyong trabaho. Kung ang dating pangakong lilikha ng isang milyong bagong trabaho ay hindi natupad, ano ang maaasahan ngayon, gayong tulad ng dati ay walang anumang kaakibat na balaking wakan ang mga makadayuhang patakarang nagpapabagsak sa lokal na produksyon at nagdudulot ng malawakang disempleyo sa bansa? Kung mayroon mang makuhang trabaho, ito'y pawang kontraktwal na magtatagal lamang ng tatlo o limang buwan kada taon; o kaya'y mga di substantibong trabahong ibinibi-



Walang pag-unlad na makakamit sa kanayunan kung patuloy na walang isasakatuparang tunay na repormang agraryo at sa halip ay lalo pang palalakasin ang monopolyong kapangyarihan ng mga luma at bagong-tipong panginoong maylupa at kumprador burges.

gay ng gubyrno tulad ng pagwalis sa kalsada.

Sa kabila ng matarik na pagsirit ng mga arawang gastusin, nagmamatigas ang rehimeng Arroyo laban sa pagtataas ng sahod ng mga manggagawa. Pikit-mata at tikombibig ito sa harap ng sunud-sunod na pagtataas ng presyo ng gasolina, ng singilin sa kuryente, tubig at *expressway*. Malala pa, binabalak nitong magpataw ng mga karagdang buwis na papatong pa sa napakabigat nang pasanin sa balikang masang anakpawis.

Hungkag ang bukambibig nitong pag-unlad ng agrikultura. Walang pag-unlad na makakamit sa kanayunan kung patuloy na walang isasakatuparang tunay na repor-

mang agraryo at sa halip ay lalo pang palalakasin ang monopolyong kapangyarihan ng mga luma at bagong-tipong panginoong maylupa at kumprador burges.

Dahil sa neoliberalisasyon sa agrikultura na itinataguyod ni Arroyo, ang kanayunan ay lalo pang nalulugmok sa pagkaatrasado at kahirapan. Ang malawakang pagtambak sa bansa ng mga dayuhang produktong agrikultural at mga mahahalang imported na sangkap tulad ng binhi, abono, pestisidyo, at iba pa ay pumapatay sa lokal na produksyon at nagdudulot ng pagkalugi sa mga magsasaka. Walang makakamit na pag-unlad sa kanayunan kundi yaong pakikinaabangan ng mga dambuhalang dayuhang monopolyong korporasyon sa agribisnes at malalaking komprador at panginoong maylupa.

Walang mapaniwala si Arroyo sa ipinagmamalaki niyang "balansyadong pambansang badyet". Saan niya kukunin ang pondo? Sa laki ng depisit sa badyet, tiyak na mamamayan ang lubos na mapipiga sa dami ng ipapataw na karagdang buwis at gagawing pagtitipid sa mga serbisyong panlipunan. Upang mabigyan ng bagong utang, ibayong pagmamanikluhod ang gagawin nito sa IMF. At saan naman ito mapupunta? Saan pa kundi sa pagtustos sa lumalaking gastos-militar at sa pagbabayad sa utang ng gubyrno at utang panlabas ng bansa. Saan pa kundi sa



Taon XXXV Blg. 13 Hulyo 7, 2004

Ang *Ang Bayan* ay inilalabas sa wikang Pilipino, Bisaya, Iloko, Hiligaynon, Waray at Ingles.

Maaari itong i-download mula sa Philippine Revolution Web Central na matatagpuan sa:

www.philippinerevolution.org

Tumatanggap ang *Ang Bayan* ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikauunlad ng ating pahayagan. Maaabot kami sa pamamagitan ng email sa: angbayan@yahoo.com

Nilalaman

Editoryal

Hungkag at mapanlinlang ang 10-puntong programa ni Arroyo	1
Usapang pangkapayapaan	3
Planong pag-amyenda sa konstitusyon	4
Kampanyang militar ng BHB sa Panay	5
Rebolusyong agraryo sa Central Luzon	6
Ka Argie: Mandirigmang medik	8
Sistema ng edukasyon	9
Pondo ng pasista	10
Mga palabas ni Arroyo	10


Sa ibayong dagat

Papet na gubyrno, itinayo sa Iraq	11
-----------------------------------	----

Balita

12

Ang *Ang Bayan* ay inilalathala dalawang beses bawat buwan ng Komite Sentral ng Partido Komunista ng Pilipinas



bulsa ng mga bulok na upisyal ng gubyrerno?

At ano ang sinasabi ni Arroyo na "makatarungang pagwawakas ng prosesong pangkapayapaan"? Sa nakaraang pag-uusap sa Oslo, Norway, pinatunayan ng rehimen na hindi ito tunay na seryosong kamitin ang kapayapaan. Ang pakikipagnegosasyon ng rehimeng Arroyo ay walang ibang layunin kundi linaling, ipresyur at pasukuin ang rebolusyonaryong kilusan. Nagpatumpik-tumpik itong ipatupad ang mga kasunduan habang patuloy na nagmamatigas sa mas maraming mahahalagang punto.

Walang matatamong kapayapaan kung walang paglutas sa mga usaping nasa ugat ng digmaang sibil at kung patuloy na paiigtingin ni Arroyo ang "gerang kontra-terorismo" at tatanging seryosong harapan ang mga usaping panlipunan at pang-ekonomya na siyang nasa likod ng sumusulong na digmang bayan. Kung patuloy na magmamatigas si Arroyo, walang makakamit na makabuluhang pagsulong sa usapang pangkapayapaan.

Habang patuloy na tumatanggi ang rehimeng US-Arroyo na lubusang harapan ang mga ugat ng digmang sibil, patuloy naman ito sa panunuyo sa mga reaksiyunaryong kalaban sa pulitika. Nais umano nitong "isara ang libro" ng mga pag-aalsang bayan na nagpabagsak sa

mga kinamuhang rehimeng Marcos noong 1986 at Estrada noong 2001, subalit hindi tungo sa pagkakamit ng katarungan para sa mamamayan at paggawad ng narapat na kaparusahan sa mga may kasalanan sa bayan. Ang pakikipagaregluhan sa mga Marcos at kay Estrada, at mga iniaalok na suhol sa mga kalaban sa pulitika ay lalong gumagatong sa laganap na pagkasuklam ng mamamayan sa bulgarang pandaraya ni Arroyo sa nagdaang eleksyon.

Sa pagsasakatuparan ng rehimeng Arroyo ng mga patakarang lalong mapaniil sa mamamayan at mapagmanikluhod sa imperyalistang US, lalo rin nitong itinutulak ang mamamayang Pilipino na magkaisa upang wakasan ang kanyang paghahari. Gusto mang isara na ni

Arroyo ang "libro ng mga pag-aalsa sa EDSA," tiyak na mahaharap ito kapwa sa panibagong mga pag-aalsa at sa ibayong pag-abante ng rebolusyonaryong armadong pakikibaka ng mamamayang sukdulan nang naghihirap at puno na ng galit sa bulok na reaksiyunaryong gubyrerno at sistema.

Ang papalubhang krisis ng naghaharing sistema ay nagdidiin sa pangangailangan ng rebolusyonaryong pakikibaka upang ipaglaban ang pambansa at demokratikong interes ng mamamayan.

Tanging ang programa para sa pambansa-demokratikong pagbabago na isinusulong ng Partido Komunista at mga rebolusyonaryo at progresibong pwersa ang lulutas sa pinakamalaking suliranin ng mamamayang Pilipino. AB

Ikatlong *round* ng usapang pangkapayapaan, nakakadismaya —JMS

"**N**akakadismaya!" Ito ang pahayag ni Jose Maria Sison, *senior political adviser* ng NDFP *negotiating panel*, kaugnay ng ikatlong *round* ng pormal na usapan na idinaos sa Oslo, Norway noong Hunyo 22-25. Nagkasundo ang dalawang panig sa ilang mahahalagang bagay ngunit hinadlangan ng GRP *peace panel* ang pagsasanib ng mga ito sa iisang dokumento. Batay sa kondukta ng kanilang panel at sa mga sinasabi at kilos ng mga upisyal ng gubyrerno sa labas ng usapan, pumasok lamang ang GRP sa ikatlong *round* ng pakikipag-usap para magpakitang-tao bago ang inagurasyon ni Arroyo bilang presidente at likhain ang ilusyong interesado pa ang rehimeng Arroyo sa usapang pangkapayapaan.

Masyadong nagmamalaki ang rehimeng Arroyo at ipinamumukhang hindi nito kailangan ang pakikipag-usap sa rebolusyonaryong kilusan, ani Sison. Nagbabala siya na kung hindi seseryosohin ng GRP ang mga napagkaisahan sa ikatlong *round*, maaaring lumala ang relasyon ng dalawang panig.

Ayon sa GRP, sarado na ito sa paggawa ng anumang hakbang kaugnay ng pag-aalis sa PKP, BHB at kay Sison sa listahan ng US ng mga "terorista". Sasampu pa rin lamang ang bilanggong pulitikal na pinalaya ng GRP sa 32 na ipinangako nitong palayain mula sa 300 kabuuang bilang ng mga detenidong pulitikal. Wala ring nangyari sa ipinangakong pag-aayos ng bayad-pinsala sa mga biktima ng diktadurang Marcos. AB

Adyenda ng US ang planong pag-amyenda sa konstitusyon

Ang binabalak na "chacha" (*charter change*) o pag-amyenda sa reaksyunaryong konstitusyon ay isa ngayon sa mga kagyat na adyenda ng imperyalismong US sa Pilipinas.

Kaya naman nagkukumahog ngayon si Gloria Macapagal-Arroyo, katuwang ng masusugid niyang tagasuporta, na pagkaisahin ang mga reaksyunaryong pulitiko sa planong ito. Buong-pagmamadali rin ni Arroyo dahil sa lahat ng mga reaksyunaryong pulitiko, siya ang pangunahing makikinabang dito.

Pinatatampok ngayong usapin sa balak na pag-amyenda sa konstitusyon ang pagbabago sa anyo ng pamahalaan—mula sa kasalukuyang sistemang presidensyal tungo sa sistemang parlamentaryo. Ngunit ang usapin ng pagbabago sa anyo ng pamahalaan sa ilalim ng kasalukuyang sistemang pampulitika at panlipunan ay makabuluhan lamang para sa mga reaksyunaryo. Ni-reresolba lamang nito ang usapin ng mga

pamamaraan ng mahinahong paghahatian sa kontrol sa poder.

Ang mas importanteng usapin sa "chacha", sa katunayan, ay ang mga planong alisin ang mga deklaradong prinsipyo ng pambansang patrimonya at kalayaan upang bigyang-daan ang lubos na dominasyon ng imperyalismong US sa buhay ekonomya, pulitika at militar ng Pilipinas. Hindi lihim ang adyenda ng US na burahin sa pamamagitan ng "chacha" ang pagbawal sa pagtatayo ng mga dayuhang base militar, sa pagpasok ng mga dayuhang tropa nang walang tratado at sa pagpapasok ng mga armas nukleyar. Hangad din nitong alisin ang mga natitirang probisyon laban sa dayuhang pag-aari ng mga lupain at sa 100% pag-aari sa mga empresa; at tanggalin ang kapangyarihan ng mga korte

na maghusga sa mga pang-ekonomyang usapin.

Layunin din ng US at mga lokal na alipures nito na burahin ang mga pormal na karapatang sibil ng mamamayang Pilipino at isanib sa konstitusyon ng Pilipinas ang doktrinang "anti-terorismo"


ng US, at bigyang-daan ang mga pasistang batas at kaayusan tulad ng National ID System para mas madaling supilin ang mamamayan.

Matatandaang nangako si Arroyo noong panahon ng kampanya na kung mananalo ay bababa siya bilang pangulo sa 2007 upang bigyang-daan ang pagsisimula ng parlamentaryong sistema ng guberno. Nais lamang niya noong palabasing hindi siya hayok sa kapangyarihan at makuha ang simpatya ng mga botante. Ngunit ilang oras pa lamang matapos manumpa noong Hunyo 30, binawi na niya ang pangakong ito.

Katatapos pa lamang maplantsa ni Arroyo ang "ligalidad" ng bagong termino niya, plano na agad niya ang iba na namang paraan para sa panibagong ekstensyon ng kanyang paghahari. Nagpahiwatig na rin siya ng pagiging bukas sa panukalang maupo bilang presidente at *prime minister*, katulad ng diktador na si Marcos noong 1978. Lalo lamang nitong ginagalit ang mamamayan at ginagatungan ang masidhing girian sa hanay ng mga naghaharing pangkatin.

Ang mga progresibong partido at mga demokratikong organisasyong masa ay nangunguna sa pagkilos ng mamamayan laban sa "chacha." Wasto ang kanilang paninindigan na ang "chacha" ay magsisilbi lamang sa interes ng dayuhang kapital at mga naghaharing uri at magdudulot lamang ng lalong pagpapahirap at pang-aapi sa mamamayang Pilipino.

Wasto rin nilang idiniriin na kailangan munang harapin ang mga kagyat na usapin ng lumalalang krisis pangkabuhayan, papsidhing kahirapan at iba pang suliranin ng bansa at ng mamamayang Pilipino bunsod ng sunud-sunod na pagtaas ng presyo ng mga saligang bilihin at serbisyo, kawalan ng hanapbuhay, patuloy na pagbagsak ng halaga ng kanilang sahod at kita, patuloy na militarisasyon at paglabag sa mga karapatang-tao, nasisikil na mga karapatan sa pamamahayag at iba pa.



Mga aral sa kampanyang militar ng BHB sa Panay

Ang suporta ng masa ang susi sa matagumpay na pagsalakay ng BHB sa munisipyo at istasyon ng pulisya sa Tubungan, Iloilo noong Hunyo 15. Ayon kay Julian Paisano, tagapagsalita ng Coronacion "Waling-Waling" Chiva Command ng BHB-Panay, ang malawak na masa ng magsasaka at iba pang sektor ang nag-aruga sa mga Pulang mandirigma sa buong proseso ng paghahanda ng taktikal na opensiba at, sa mismong oras ng operasyon, nagkubli sa umaabanteng hukbo habang papalapit na ito sa target. Ginawa nilang bingi't bulag ang kaaway kaya naging matagumpay ang reyd.

Presisyon, organisasyon at disiplina. Marami ang namangha sa presisyon, organisasyon at disiplina ng BHB sa pagdisarma ng mga pulis, sa pagtiyak na walang sibil-yang madadamay at sa maayos na pag-atras ng mga pwersa nito. Sa loob ng 35 minuto, mabilis na tinapos ang mismong opensiba at organisadong nakaatras ang mga Pulang mandirigma dala ang mga nakumpiskang armas, mga bala at iba pang kagamitang militar. Ilang oras pa ang lumipas bago nakakilos ang reimporsment ng kaaway dahil sa laking takot ng mga ito na matambangan ng mga yunit ng BHB.

Bandang ala-una ng hapon nang pasukin ng BHB ang munisipyo. Agad na ipinakat ang *blocking forces* sa tatlong ruta papasok at palabas ng poblasyon. Inakala ng mga pulis, mga empleyado ng munisipyo at mga nagesseminar na CVO na mga tropa ng Philippine Army ang dumating.

Walang kamalay-malay ang mga pulis na abala sa panonood sa telebisyon ng mainit na pagbibilang ng mga boto para sa presidente at bise-presidente at sa bantang destabilisasyon. Nagulat na lamang sila nang dumating ang mga Pulang mandirigma at disarmahan sila ng mga ito. Sabay na nakontrol ng iskwad Abe ang *staff house* (na nagsisilbi ring *guard house* na kinaroonan din ng mga armas at *base radio*) at ng iskwad Kaloy naman

ang bahaging harapan, at ang una't ikalawang palapag ng munisipyo. Pinadapa ang mga nabihag na pulis at ang mga empleyado. Kasabay nito, inasolt at kagagdaka'y nakontrol ng iskwad Baking ang istasyon ng pulisya.


Operasyong walang putok ang orihinal na plano ng BHB. Ngunit nang magkulong sa kanyang upisina ang hepe ng pulis at magpapatok ng kanyang M16, napilitan na ring gumanti ng putok ang BHB. Habang nagpapalit ng mga putok, hinikayat ng BHB at pati ng mga tauhan niyang pulis na sumuko na lamang ang hepe at hindi naman siya sasaktan. Tumagal nang kalahating oras ang putukan. Sa bandang huli, nakaakyat sa ikalawang palapag ang hepe at ginawa niyang pananggalan ang mga sibilyan. Sa gayong kalagayan, nagpasya ang kumand na umatras na lamang para walang madamay na sibilyan. Binigyan ng medik ng BHB ng paunang lunas ang isang empleyadong nasugatan dulot ng nabasag na salamin. Sa kabuuan,

isang oras ang itinagal ng taktikal na opensiba—mula sa lunsaran hanggang sa pag-asolt, pagdisarma sa kaaway at pag-atras ng buong pwersa.

Regulasyon ng BHB. Mahusay na naipakita ng mga Pulang mandirigma sa mga nabihag na pulis at sa mga empleyado ng munisipyo ang mataas na antas ng disiplina at mahigpit na pagtalima sa mga patakaran ng rebolusyonaryong kilusan at mga pandaigdigang kumbensyon at protokol sa Geneva kugnay ng pagrespeto sa mga karapatang-tao at sa maayos na pagtrato sa mga *hors de combat*. Habang iginagapos ang mga dinisarmahang pulis, sinabihan silang mga armas lamang nila ang kailangan sa kanila.

Nagpamudmod rin ang mga Pulang mandirigma ng ilang kopya ng *Ang Bayan* at mga polyeto ng Napoleon Tumagtang Command (kumand ng nakasasaklaw na larangang gerilya) sa mga pulis at empleyado, kasabay ng pagpapaliwanag tungkol sa isinusulong na rebolusyonaryong adhikain ng mamamayan. Nagtirik sila ng dalawang bandila ng Partido Komunista ng Pilipinas sa harapan ng munisipyo ng Tubungan bago sila umatras. Kinunan ng mga litrato at bidyo at inirekord sa *tape* ang buong proseso ng pag-asolt hanggang pag-atras ng mga pwersa.

Bago ito, nireyd ng BHB ang E. C. de Luna Construction sa Barangay Partition, Guimbal, Iloilo. Sinalakay ng isang pinaliit na platoon ng BHB ang *compound* ng kumpanya bandang 10:00 ng gabi ng eleksyon. Pinarusahan ang kumpanya sa di pagbabayad ng rebolusyonaryong buwis. Kinumpiskahan din ng dalawang baril ang mga gwardya.



Naaning kagamitang militar.

Nakasamsam ang BHB ng 18 armas sa dalawang buwang kampanyang militar sa naturang larangang gerilya. Mula sa Tubungan ang 15 sa mga ito: walong M16, isang M14, tatlong pistolang 9 mm, isang pistolang Super .38, isang *pistolized shotgun* at isang de-12 *pugakhang* (katutubong desabog). Nakumpiskarin ang sarisaring magasin at bala, tatlong *rifle grenade*, isang *base radio*, dalawang VHF *handset* at iba pang gamit militar. Nasamsam naman sa De Luna Construction ang isang *shotgun* at isang .38 rebolber.

Ilang aral. Bukod sa epektibong paggamit ng superyor na pwersa at elemento ng sorpresa, mahalagang bahagi ng paghahanda para sa reyds sa Tubungan ang maraming pagsasanay na pinagdaanan ng mga mandirigma at upisyal na lumahok dito. Dumaan sila sa Batayang Kursong Pulitiko-Militar (BKPM)

at *intelligence and operations study conference* para sa mga kadre at upisyal militar. Bago ilunsad ang kampanyang militar, nag-ensayosila sa pagbabasa ng mapa, naglunsad ng mga *dry run* at nanood ng mga bidyo tungkol sa mga taktika at teknika sa mga reyds. Nagsilbing *dry run* para sa mga Pulang mandirigma ang reyds sa E. C. de Luna Construction para sa mas malaki at matagumpay na pagsalakay ng Tubungan Police Station.

Masusi ring pinag-aralan ng mga Pulang mandirigma ang Comprehensive Agreement on Respect for Human Rights and International Humanitarian Law (CARHRIHL) laluna sa usapin ng wastong pagtrato sa mga sibilyan at napasukong kaaway.

Bago at matapos ang reyds sa Tubungan, naglunsad ang BHB ng mga kampanyang pampulitika at pangkultura upang itaas ang moral at diwang mapanlaban ng BHB at

masa sa lugar.

Mahusay ding nasamantala ng BHB ang maigting na bangayan sa hanay ng mga reaksyunaryong pulitiko at mga katoto nila sa militar at pulisya. Abalang-abala ang mga upisyal at yunit ng AFP at PNP sa pagpapagamit sa kani-kanilang mga pinapaborang pulitiko, pagpapakana laban sa mga karibal na kandidato at pagmamatyag sa pinangangambahang destabilisasyon sa mga syudad at kabisera.

Higit sa lahat, susi sa pagtagumpay ng nakaraang kampanyang militar ang malakas at malawak na suporta ng masa sa rebolusyonaryong armadong pagkikibaka. Walang sawa ang pagtangkilik at pagtitiyak ng masang magsasaka at ibapang mamamayan sa seguridad habang tipon ang malaking pwersa ng BHB sa mahaba-habang panahon ng pagsasanay at pag-aaral mula Abril hanggang sa aktwal na paglulunsad ng mga taktikal na opensiba. **AB**

Sumusulong ang rebolusyong agraryo sa Central Luzon



Makabuluhan na ang mga tagumpay na natamo ng masang magsasaka sa pagsumulong ng mga pakikibakang antipiyudal sa Central Luzon.

Partikular sa Nueva Ecija, nagsimula nang sumaklaw sa buong probinsya ang iba't ibang kampanya sa pagpapababa ng upa sa lupa, paglaban sa usura, pagpapataas sa sahod ng mga manggagawang bukid, pagpapababa ng upa sa makinarya at pagpapataas ng presyo ng kamatis, palay at iba pang produkto ng magsasaka.

Aabot sa mahigit 4,000 manggagawang bukid sa 13 baryo sa tatlong bayan ang nakinabang sa mga kampanyang ito.

Pinakamasigla ang pakikibakang agraryo sa isang tipak ng anim na bayan sa probinsya. Sa isang bayan dito, siyam na ektaryang lupa ng panginoong maylupa ang pinusisyonan ng walong magsasaka. Ilang taong hindi nakilusan ang lugar kaya natigil ang paglulunsad ng mga pakikibakang agraryo roon. Subalit nang maisaayos muli ang organisasyong masa ay muli ring bumwelo ang mga rebolusyonaryong pagkilos, laluna ang pakikibakang antipiyudal. Naibaba nang mahigit 50% ang tantos ng usura

bunga ng tagumpay sa paglaban sa malaking usurero-komersyante sa lugar na dating nagpapautang nang may 30% interes kada buwan. Tatlong magkakanugnog na baryo ang kumilos para rito.

Napababa rin ang upa sa traktora mula sa ₱2,000-₱2,200 tungong ₱1,800 kada ektarya. Umabot sa 70 ektarya ang sinaklaw nito noong Nobyembre 2003 at 70 magsasaka ang nabiyayaan.

Sa dalawa pang bayan dito, 3,150 manggagawang bukid ang nakinabang nang maitaas ang sahod mula ₱1,200 kada ektarya sa 15 kataong magtatanim (14 manggagawang bukid at isang kabesilya) tungong ₱1,400-₱1,500 kada ektarya. Naiapatupad ito sa walong baryo. Tinatayang di bababa sa 2,000 ektarya ang saklaw ng sakahang tinataman ng mga nabiyayaang manggagawang bukid.

Isang malawak na patubig naman sa isang baryo ang samasamang isinaayos ng may 100 kasapi ng Pambansang Katipunan ng Magbubukid. Aabot sa daang ektarya ang nagkaroon ng patubig.

Sa Nueva Ecija at iba pang lugar sa Central Luzon, kaakibat din ng mga pakikibakang agraryo ang pakikibaka laban sa militarisasyon. Dahil tagapagtanggol ng mga panginoong maylupa at iba pang mapagsamantalang uri ang reaksyunaryong militar, sabay na nilalabanan din ng masang magsasaka ang pandarahas at pamiminsala ng AFP sa simula, sa gitna at matapos ang mga kampanyang antipyudal.

Iba pang prubinsya. Sa Bulacan, naisulong ang pagpapababa ng pasahe ng sitaw, naitaas ang presyo ng uling, napusisyon ang ilang lupang tiwangwang at nilalabanan ang pagpapalayas ng pangino-

ong maylupa. May nailunsad ring organisadong pangangapa (panghuhuli ng isda o hipon sa pamamagitan ng mga kamay), pagpapataas ng sustento o sahod ng bantay-palaisdaan mula ₱3,000 tungong ₱4,500, pagtataas ng upa sa manambak mula ₱120 tungong ₱150.

Sa Pampanga, naisulong ang pakikibaka para sa pagtataas ng presyo ng produkto ng mga Aetang nagkakaingin. Patuloy ding ikinakampanya sa kabundukan ang pagtatanim at produksyon ng palay.

Naipagtagumpay naman ng mga magsasaka sa isang baryo ang pananatili sa lupang dati na nilang napusisyon kahit natayuan na ng isang mamahaling subdibisyon ang iba pang bahagi ng lupa. Samantala, patuloy pa rin ang rehabilitasyon sa lupang natambakan ng lahar nang pumutok ang Mt. Pinatubo noong 1991. Mula sa dating 80 ektarya, aabot na sa 200 ektarya ang natanggalan ng buhangin at maaari nang ihanda para muling masaka. Naitutuloy din ang laban sa ilang baryo sa walang habas na *quarrying* (paghahakot) ng buhangin na nagreresulta sa pagkatuyo ng tubig para sa mga sakahan.

Sa Tarlac, naitaas ang parte ng mga kasamá sa isang panginoong maylupa mula sa dating 50-50 tungong 75-25 at naibigay ang iba pa nilang mga kahilingan. Pinusisyon din ng mga magsasaka ang lupain ng isang *absentee landlord*. Isa pang grupo ng may 100 magsasaka ang umokupa sa tiwangwang na lupa. May nailunsad ring pakikibaka para di magbayad sa lupang residensyal na kinamkam lamang ng isang panginoong maylupa, at pakikibaka laban sa pangangamkam sa komunal na *pisqueria* o palaisdaan.

Organisado namang nabawi ng 56 pamilya sa Zambales ang 480 ektaryang kinamkam ng mga panginoong maylupa mula sa masa. Tuloy pa rin ang kampanyang bayanihan sa pagpapalawak ng gasak para sa pagtataas ng antas ng produksyon at kabuhayan ng masa. Matagumpay na nakipagnegosasyon ang mga maralitang magsasaka sa maliliit na panginoong maylupa sa balak nitong pagsasara ng daan sa bukid. Mayroon ding okupasyon sa apat na ektaryang lupa in ng *absentee landlord*. Ginawa itong komunal na sakahan ng 22 magsasaka. Inokupa rin ng mga magsasaka ang lupaing pag-aari ng dalawang panginoong maylupa.

Sa Bataan, naitaas ang presyo ng mga produkto ng masang Aeta. Nasimulan na sa ilang lugar ang pagpaparami ng mga binhi ng palay-bundok at gabi para makapagtanim pa nito. Nariyan din ang pagsasaayos ng patubig sa pamamagitan ng paggawa ng maliit na dam upang mapaahon sa bukid ang tubig, at nagawang biguin ang pagtatangkang palayasin sa kaniilang pusisyon ang 15 magsasaka.

Ang ilang anyo ng nailunsad na rebolusyong agraryo sa Aurora ay ang suyuan sa pagtatabas at pagkakaingin, pagsasagawa ng komunal na pagsasaka at pagpusisyon sa lupang tiwangwang kung saan 300 pamilya ang nakinabang.

Animula pa lamang ang naturang mga tagumpay. Patuloy ang pagsisikap ng rebolusyonaryong kilusan sa Central Luzon na palawakin pa ang saklaw ng rebolusyong agraryo sa buong rehiyon upang matugunan ang mga problema at mithiin ng masang magsasaka at maging matibay silang moog ng rebolusyon. **AB**

Ang pagbubuod na ito ng mga kampanyang antipyudal ay hango sa mga ulat ng Himagsik, rebolusyonaryong paghayagan ng Central Luzon.

Ka Argie: Mandirigmang medik, dentista at siruhano

Bunga ng pagpupursige at pagsisistematisa ng Bagong Hukbong Bayan sa mga pagsasanay sa gawaing medikal, kabilang ngayon sa hanay nito ang daan-daang medik, dentista at siruhano (*surgeon*). Ang kanilang talino at kakayahan ay sadyang kamamanghaan maging ng mga propesyunal at beteranong manggagamot na nakapag-aral ng medisina sa mga unibersidad. Ang naipong karanasan ng mga Pulang medik sa panggagamot ay mayamang kaban ng kaalaman sa medisina at syensya na kaagad nang napaglilingkod sa mga rebolusyonaryong pwersa at sa mamamayan.

Isa si Ka Argie sa mga medik ng BHB.

Sa edad na 35, napakayaman na ng karanasan ni Ka Argie bilang isang mandirigma, medik at siruhano. Mula sa uring magsasaka, siya ay nagsimulang kumilos bilang kabataang aktibista noong 1982 sa kanilang baryo sa Cagayan Valley.

Di naglao'y nagpasya siyang sumapi sa BHB. Bagamat wala pa siyang anumang kaalaman noon sa gawaing medikal, siya ay hinirang na maging medik ng yunit na kinabilangan niya. Sa gitna ng mga pagsasanay pampulitika at pangmilitar, si Ka Argie ay dumaan sa masusing pagsasanay sa gawaing medikal sa pangunguna ng isa nilang kasama sa yunit.

Mula noon, si Ka Argie ay nagsilbing Medical Officer (MO) ng iba't ibang yunit ng BHB na kanyang kinatalagahan. Noong mga taon ng di napapanahong regularisasyon at maiigting na armadong labanan sa pagitan ng BHB at AFP, nahasa ang kasanayan ni Ka Argie bilang siruhano, laluna sa paggagamot ng mga sugat na dulot ng tama ng bala.

Sa paglulunsad ng kilusang pagwawasto at pagbabalik ng tamang pansin at panahon ng BHB sa pag-oorganisa sa masa, nahasa rin

ang ibang aspeto ng kaalamang medikal ni Ka Argie. Sa yunit sa gawaing masa, bahagi ng kanyang pang-araw-araw na gawain ang pagtsek-ap sa mga taumbaryo at pagbibigay ng kagyat na lunas sa mga natutukoy na karamdaman. Ang pagbibigay ng gayong mga serbisyong medikal sa masa ay isa sa mahihigpit na tungkulin ng BHB bilang tunay na hukbo ng bayan.

Sa mahigit dalawang dekada bilang Pulang mandirigma at manggagamot, lumawak pa ang kaalaman at kakayahan ni Ka Argie sa larangang medikal. Natuto rin siyang maging dentista. Nakapaglilinis at nakagagawa ng pustiso.

Mayroon na rin siyang kaalaman sa pagsusuri sa ihi at dugo at maging sa pagsukat sa grado ng mata.

Bilang siruhano, bukod sa mayamang karanasan sa pag-oopera ng mga tama ng bala, nakaranas na rin siyang mag-opera ng mga may luslos at cyst. May karanasan na rin siya sa *amputation* o pagputol ng kamay o paa kapag wala nang ibang posibleng lunas.

Nakapagkabit na rin si Ka Argie ng aserong *stainless* upang kumpunihin ang nabaling buto ng isang pasyente. Bukod sa kasanayan sa



pagsesemento ng mga nabaling buto, may karanasan na rin siya sa *bone grafting* o pagdudugtong ng buto gamit ang buto mula sa ibang bahagi ng katawan.

Nakabahagi na rin si Ka Argie sa pag-oopera ng mata, sa partikular, sa paglalagay ng artipisyal na mata. Mayroon din siyang karanasan sa *skin grafting* o paggamit ng balat sa isang bahagi ng katawan upang ipantapal sa ibang parteng natuklapan ng balat.

Ang tuluy-tuloy na pag-unlad ng kaalaman at kasanayan ni Ka Argie ay patunay ng masusing pansin at pagpapahalagang ibinibigay ng BHB sa gawaing medikal.

"Ang gawaing medikal ay bahagi ng gawaing masa ng BHB," ani Ka Argie. Itinutuon ito hindi lamang sa mga pangangailangang pangkombat, kundi maging sa pagtatayo at pagpapatatag ng baseng masa, dagdag niya.

Ayon pa sa kanya, "Hindi man ganoon kataas ang antas ng espesyalisasyon ng BHB sa larangang medikal, napakalaki at napakalawak ng netong pakinabang dito ng mamamayan." Sa tulong ng gawaing medikal ng BHB, ang pinalawak at pinatatag na baseng masa ng BHB ay nagsisilbing salalayan ng pagpapaunlad ng kasanayang medikal kapwa ng hukbong bayan at ng mamamayan. AB

Sistema ng edukasyon sa ilalim ng rehimeng Arroyo

Sa tatlong taong panunungkulan ni Gloria Arroyo, hindi nito ginawang prayoridad ang edukasyon ng kabataan. Sa halip na balikatin ng gubyrno ang responsibilidad ng pagpapaunlad sa sistema ng edukasyon, nasa programa nito ang sistematikong pagpapabaya sa edukasyon. Naaayon ang kapabayaang ito sa dikta ng IMF at World Bank na talikuran ng rehimen ang mga serbisyong panlipunan upang mailaan ang badyet ng gubyrno sa pagbabayad ng utang.

Sa itinakdang pambansang badyet para sa kasalukuyang taon, P130 bilyon lamang ang inilaan sa edukasyon kumpara sa pambayad-utang ng bansa na P541 bilyon. Kulang na kulang ang halagang ito para sa mga pangangailangan ng mga mag-aaral. Dahil dito, dinaranas pa rin ng mga estudyante at guro sa mga pampublikong eskwelahan ang kakulangan sa mga pasilidad, kagamitan at tauhan. Ayon mismo sa Department of Education, ngayong pasukan ay kulang nang 39,383 silid-aralan;

4,125,413 mesa; 9.88 milyong libro at 49,212 guro. May abereyds pa ring 60 estudyante para sa bawat isang guro. Ayon sa isang pag-aaral na isinagawa ng gubyrno mismo sa hanay ng 400,000 guro, 55% ng mga eskwelahan ang walang kuryente, 84% ang walang suplay ng tubig at 38% ang walang palikuran. Ayon sa 25% ng mga sinarbey na guro, walang kisame ang kanilang mga silid-aralan. Dahil na rin sa kakulangan sa mga

guro, karamihan sa kanila ay nagtuturo ng mga *subject* na hindi nila pinagsanayan. Dahil taun-taon ay lumalaki ang bilang ng mga dapat


mag-aral, lalong lumalala ang kakulangan sa mga nabanggit.

Katulad ng mga pribadong eskwelahan, tumataas ang matrikula at iba pang bayarin sa mga pampublikong kolehiyo at unibersidad. Nakagawian na ang hindi pag-uulat ng mga pagtaas na ito sa Commission on Higher Education (CHED). Isinasangkalan ng mga administrador ng eskwelahan ang pang-eengganyo ng gubyrno na itaas ang mga bayarin sa mga serbisyong dapat ay libre. At sa katunayan, bukod sa pagtataas ng mga bayarin, ineengganyo ng gubyrno ang komersyalisasyon ng edukasyon sa pamamagitan ng pagbebenta ng ari-arian ng mga eskwelahan (tulad ng lupa) at ng pakikipagsosyo sa mga pribadong negosyo. Isang halimbawa ng gayong sosyohan ang isang pamantasan sa Northern Luzon kung saan kabilang sa administrasyon ang burges-kumprador na si Lucio Tan.

Hindi pinigilan ng rehimen ang taunang pagtataas ng matrikula at iba pang mga bayarin sa mga pribadong eskwelahan. Ngayong pasukan, batay pa lamang sa mga nakapag-ulat sa CHED, umabot na sa 214 ang mga pribadong kolehiyo at unibersidad na nagtaas ng matrikula nang 11.39% o P313.24 bawat yunit. Mapanlinlang ang sinasabi ng CHED na ang 214 ay 16% lamang ng kabuuang bilang ng mga pribadong kolehiyo at unibersidad sa bansa.

Ang totoo, wala pang ulat ang marami eskwelahan na nagtaas din ng matrikula, kabilang ang mga nasa Ilocos Region, CAR, Central Luzon, Southern Tagalog at Bicol. Hindi binabanggit ng CHED ang mas marami pang eskwelahang nagtaas ng *miscellaneous fees* sa halip na *tuition fee*.

Sa napakaraming eskwelahan, kung anu-anong hokus-pokus ang ginagawa upang mabuo ang hanayan ng samutsaring mga ba-



yarin. Hindi ipinapaliwanag sa mga estudyante ang magkakapareho mga bayarin. Halimbawa ng mga ito ang *sports fee*, *athletic fee* at *UAAP fee*; at *energy fee*, *power rate charge* at *aircon fee*. Katawa-tawarin ang iba pang mga bayaring tulad ng *development fee*, *parking fee*, *copier fee*, *late enrolment fee* at iba.

Sa maraming kaso, kung pagsasama-samahin ay mas malaki pa ang itinataas ng samutsaring bayarin kaysa matrikula. Hindi inoobligang iulat sa CHED ang pagtataas ng singil sa mga ito.

Makapasok man sa eskwelahan ang mga bata at kabataan, pinahirapan sila ng kawalang kakayahang ng kanilang mga pamilya na mapunan ang pangangailangan sa transportasyon, pagkain sa eskwela at mga kagamitan. Hindi pa rin ibinigay ng rehimen ang ilang taon nang iginigiit na ₱125 (₱155 na ngayon) dagdag na sahod ng mga manggagawa at ₱3,000 dagdag sa

Pondo ng pasista

Tahasang ipinagkakait ng rehimen sa kabataan ang karapatan nila sa libreng edukasyon. Ang mga guro naman ay pinagtitiis sa napakababang sweldo. Samantala, todo-bigay naman ito sa mga hinihingi ng AFP at PNP. Sumusunod ang ilang alokasyon para sa AFP at PNP noong nakaraang taon:

- ▶ **P3 bilyong** dagdag na sweldo ng mga elemento ng AFP
- ▶ **P2.1 bilyong** dagdag na sweldo ng mga pulis
- ▶ **P1.4 bilyon** para sa CAFGU
- ▶ **P1.2 bilyon** para sa mga bagong pulis, *jail guard* at bumbero
- ▶ **P1.1 bilyon** para sa pensyon ng mga retiradong militar
- ▶ **P800 milyon** para sa mga bagong mersenaryong sundalo
- ▶ **P96.3 milyon** para sa *Balikatan exercises*.

sweldo ng mga kawani ng guberno. Ang papaliit na tunay na halaga ng sahod at sweldo, kasabay ng pagsirit ng presyo ng langis, kuryente at iba pang pangangailangan, ay lalo lamang nagkakait sa kabataan ng karapatang makapag-aral.

Ayon sa isang ulat, 1.7 milyon ng mga batang edad 7-12 ang hin-

di nag-aaral. Mula naman sa walong milyong kabataang dapat ay nasa kolehiyo, 2.3 milyon lamang ang aktwal na nakakapag-aral. Ayon naman sa isang pag-aaral ng Ateneo de Manila University, sa bawat 100 mag-aaral, 66 lamang ang nakapagtatapos ng elementarya, 42 ng hayskul at 14 lamang ang nakapagtatapos ng kolehiyo. **AB**

Mga palabas ni Arroyo

Ipinagmamalaki ng rehimen ang dalawang programa nito sa edukasyon. Inilunsad ang mga palabas na programang ito sa huling mga buwan ng panunungkulan ni Gloria Arroyo sa imbing hangaring makuha ang boto ng mga estudyante at kanilang mga magulang. Inilunsad ang Iskolar sa Bawat Mahirap na Pamilya nito lamang Abril. Inumpisahan naman ang Student Assistance Fund for Education for a Strong Republic (SAFE 4 SR) noong maagang bahagi lamang ng taong kasalukuyan. Nakadiseno ang dalawang programa sa edukasyon para sa mga estudyante sa kolehiyo, na nasa edad para bumoto, lalo na ang SAFE 4 SR na para sa mga nasa ikatlo't ikaapat na taon.

Sa ilalim ng Iskolar sa Bawat Mahirap na Pamilya, limang milyon umang mag-aaral ang magiging iskolar sa loob ng dalawang taon sa alinmang pampublikong kolehiyo o unibersidad, o maaaring pagtapusin ng dalawang-taong kursong teknikal o bokasyunal. Sistemang *study-now, pay-later* naman ang SAFE 4 SR, na magpapautang ng pondo para sa mga estudyanteng nasa ikatlo't ikaapat na taon

upang makabayad sa eskwelahan at sa gayon ay makatapos umano ng pag-aaral.

Pabor ang programa ni Arroyo sa mga kapitalistang may-ari ng mga pribadong eskwelahan dahil tiyak pa ring makapagbabayad ng matrikula ang mga estudyanteng benepisaryo kahit tumaas pa ang mga bayarin. Pero bukod sa kakarampot na bilang ng mga mag-aaral na mabibiyayaan, libu-libo pang estudyante ang mapipilitang tumigil sa pag-aaral dahil sa bigat na ng mga gastusin.

Ang malaking tanong ay kung saan kukunin ni Arroyo ang bilyun-bilyong pisong kakailanganin niya para tustusan ang ambisyosong proyektong ito gayong napakalaki na ng depisit sa badyet ng guberno. Ang tumitimo sa isipan ng marami, isa na naman itong engrandeng panlilinlang di lamang para kunin ang boto ng mga estudyante kundi mapahupa rin ang nangngangalit nilang damdamin sa grabeng pagpapabaya ng guberno ni Arroyo sa kanilang kagalingan. Kung tutuusin, hungkag ang mga programang ito dahil nararapat lamang na libre ang edukasyon para sa lahat ng mag-aaral. **AB**



Papet na gubyrerno, itinayo ng US sa Iraq

Noong Hunyo 28, ipinwesto ng US ang isang papet na gubyrernong Iraqi sa pamamagitan ng isang seremonya sa Baghdad. Kasabay nito, pormal na nilusaw ng US ang Coalition Provisional Authority (CPA), ang kolonyal na administrasyong naghari-harian sa Iraq sa nakaraang 14 buwan. Hinirang na *prime minister* si Iyad Allawi, isang operatiba kapwa ng CIA at ng MI-6 ng UK kahit noong kasapi siya ng partidong Ba'ath ni Saddam Hussein.

Patuloy na pinananaig ng US ang kolonyal na kapangyarihan nito sa Iraq. Kasabay ng pagpapauupo kay Allawi bilang *prime minister*, patuloy ang aktibong pagrerekrut at pagsasanay ng papet na armadong hukbo na magiging pangunahing salalayan ng neokolonyal na kapangyarihan ng US sa Iraq. Hangad ng US na patuloy nitong kontrolin ang pulitika, militar at ekonomya ng Iraq, kamkamin ang yaman nitong langis at gamitin itong tuntungan sa paghahari sa buong Middle East.

Habang kinokonsolida ng US ang neokolonyal na kapangyarihan nito sa Iraq, nasa interes nitong panatilihin ang mga mapanakop nitong tropa sa Iraq. Bago siya lumisan, tiniyak ni CPA Administrator Paul Bremer na hindi maaaring patalsikin ng papet na gubyrerno ang 146,000 tropa ng US. Bagamat nakapwesto na ang papet na gubyrerno, patuloy na magsisilbing sentro ng kolonyal na paggugubyrerno ang embahada ng US sa Baghdad. Ipagpapatuloy ng bagong talagang ambasadador na si John Negroponte ang dating papel ni Paul Bremer. Tungo rito, itatalaga ng US ang aabot sa 3,000 tauhan upang manghimasok sa iba't ibang larangan ng gawain ng papet na gubyrerno, tiyakin ang pribatisasyon ng ekonomya ng Iraq at ipatupad ang mga repormang pang-ekonomya na higit pang mag-

papahigpit sa kontrol ng mga kumpanyang Amerikano sa bansa.

Pangunahing layunin ng US ang pagkontrol ng US sa mga rekurso at kita sa langis ng Iraq. Kaalinsabay at kaakibat din nito, pananatilihin ng US ang kontrol nito sa lahat ng mga pribilehiyo sa negosyo at mga kontrata na ibinigay sa mga paboritong kroni ng gubyrernong Bush sa kunwa'y rekonstruksyon ng mga sinira ng gera ng US at ang pagsusuplay ng mga kagamitang militar ng US sa Iraq. Tinitiyak ng US na ang mga ito ay hindi mababago ng bagong papet na rehimen. Pinagtibay na ang mga batas ukol sa operasyon ng mga korporasyon, kabilang ang tahasang pagbabawal ng mga welga.

Kasabay nito, patuloy na umiigting ang armadong paglaban ng mamamayang Iraqi at lumalawak ang kanilang nagkakaisang prente ng mga rebolusyonaryo at rebel-deng pwersa na yumayanig sa paghahari ng US sa Iraq. Patuloy si-

lang nagbabangon sa kabila ng walong tigil at maramihang pagmamasker, pambobomba at paninira at napakatindi ng pang-aapi ng mga pwersang US sa mamamayan ng Iraq. Determinado silang lumaban upang parusahan ang mga mananakop at mga taksil na papet at ipagkait ang bayan nila sa mga mananakop.

Inaatake nila ang mga pwersa, pasilidad at lohistika ng militar, pulisya, mga kontratistang panseguridad at burukrasyang panggubyrerno ng US, mga kaalyado nito sa pananakop sa Iraq at ng papet na gubyrerno sa Iraq. Ang lumalaking pinsalang tinatamo ng US ay nagpapalakas ng panawagan sa loob at labas ng US na lubusang paalisin na ang mga tropa nito sa Iraq.



Habang lumalala ang krisis ng paghahari ng US sa Iraq, lalong mas mainam para sa mamamayan at mga rebolusyonaryong armadong pwersang Iraqi na

bigwasan kapwa ang mga pwersa ng US at ang mahina pang papet na gubyrerno nito. Ang mga tropang Amerikano na kailangan ngayong pumirmi sa kanilang mga kampo ay nagiging mas madaling target ng mga armadong pwersang Iraqi.

Malinaw sa mamamayan at rebolusyonaryong Iraqi na tanging ang kanilang puspusan at malawakang mapagpalayang armadong paglaban ang makapagpapatalsik sa mga dayuhang mananakop at makapagbabalik ng soberanya at katiwasayan sa Iraq.

AB

2 martir ng BHB, pinarangalan ng NDF sa Mindanao

PINARANGALAN ng National Democratic Front-Northern Mindanao sina Ka Geril Manggubat, tagapagsalita ng Pulang Diwata Command, at Ka Johnny, isang Pulang mandirigma, noong Hunyo 21. Nasawi ang dalawang mandirigma matapos ang

matagumpay na reyd sa istasyon ng PNP sa Bayugan, Agusan del Sur noong Hunyo 19. Inabutan sila ng reimporsment ng PNP habang umaatras mula sa lugar ng labanan. Nagsisilbing inspirasyon ang kanilang mga buhay sa higit pang pag-

papaigting ng armadong pakikibaka sa rehiyon.

Nakakumpiska ang Red Alimaong Platoon ng pitong M16, limang M14 at mga bala sa naturang reyd. Dalawang tropa ng PNP ang napatay.

Mga bagong kaso ng panunupil sa malayang pamamahayag, ibinunyag

TUMITINDI ang panunupil sa malayang pamamahayag sa bansa. Ilang linggo lamang makaraang payagang makabalik sa ere ang Bombo Radyo-Isabela, isa namang programa sa radyo ang pinatitigil ng militar at pulisya.

Noong Hunyo 23, sapilitang pinaalis sa ere ang Radyo Anakpawis, isang lingguhang programa ng Samahang Magbubukid sa Timog Katagalugan, na isinasahimpapawid ng istasyong DZRB sa Batangas City. Ayon sa militar, ang Bagong Hukbong Bayan diumano ang nagmamantine ng programa. Pinatitigil din ang mga pagbatikos sa gubyernong Arroyo.

Nagpahayag ng patutol sa paninikil sina Danny Debolgado, manidyer ng DZRB, at Orly Marcellana, tagapangulo ng Bayan Muna-Southern Tagalog, na

anchorman ng programa. Si Marcellana ay byudo ng pinaslang na tagapagtaguyod ng karapatang-tao na si Eden Marcellana. Ipinagpatuloy nila ang pagbobrodkas ng programa sa kabila ng banta ng mga militar at pulis na rereydin nila ang istasyon.

Sa Mindanao, mariing kinundena ng Bagong Alyansang Makabayan-Socsargen Chapter ang pagpaslang kay Ely Binoya, komentarista at manidyer ng dzRH-Radyo Natin sa prubinsya ng Saranggani, noong Hunyo 17. Dalawang linggo bago siya paslangin sa Barangay Batomelang, binugbog siya ng mga kamag-anak ni Mayor Teodoro Padernilla ng Malungon. Ang kaso ni Binoya ay ika-15 nang dokumentadong kaso ng mga peryodistang pinatay habang gumaganap sa kanilang tungkulin mula 2001.

Anim na pagsasanay militar ng US at AFP, gaganapin mula Hulyo

NAKATAKDANG simulan ang serye ng mga "pinagsanib na pagsasanay" ng AFP at mga tropang Amerikano para sa taong 2004 sa darating na Hulyo 26 sa Carmen, North Cotabato. Tatagal nang hanggang Agosto 14 ang pagsasanay na ito. Sadyang pinili ng US ang Cotabato dahil sa makapal na presensya ng Moro Islamic Liberation Front (MILF) na inaakusahan nitong nakikipagkutsabahan sa Jemaah Islamiyah (JI), isang grupong itinuturing nitong terorista. Katulad ng nakaraang mga pagsasanay, isinasangkalan ng US at ng AFP ang presensya ng mga rehiyunal na terorista upang itago ang kanilang armadong panghihimasok sa mga usapin

ng bansa.

Para sa buong taon, limang pagsasanay pa ang natakandang idaos.

(1) Fusion 04-2 na magsisimula sa ikalawang linggo at matatapos sa ikatlong linggo ng Hulyo, ayon AFP Information Office. Sasali sa pagsasanay laban sa narkotiko at kontra-terorismo ang US Navy at Joint Interagency Task Force West, Philippine Drug Enforcement Agency, Philippine Navy at Coast Guard. Idadaos ito sa Subic Bay, Zambales at sa erya ng Southern Command sa Western Mindanao.

(2) Balance Piston o pagsasanay ng *light infantry battalion* sa 6th ID Training Unit sa Carmen, Co-

tabato City mula katapusang linggo ng Hulyo hanggang katapusang linggo ng Agosto. Mga 150 tropa ng Amerikano at Special Forces ng AFP ang sasali.

(3) CARAT o Cooperation Afloat Readiness and Training ng mga kasapi ng US at Philippine Navy nitong rin Hulyo.

(4) US-RP Maritime Surveillance Exercises (Marsur vex) na magsisimula sa pagsasanay ng 100 personel sa paggamit ng mga sasakyan pamhimpapawid at pandagat sa unang linggo ng Agosto.

(5) Palah exercises sa huling kwarto ng taon para sa mga kasapi ng US Navy at Special Warfare Group ng Philippine Navy.

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XXXV Blg. 13
Huyo 7, 2004
www.philippinerevolution.org

Editoryal

Hungkag at mapanlinlang ang 10-puntong programa ng rehimeng Arroyo



Isang malaking panloloko ang ipinamamarali ni Gloria Arroyo na 10-puntong programa. Wala itong ibang layon kundi linlangin ang mamamayan at pagtakpan ang kainutilan ng rehimen na itaguyod ang interes ng nakararaming mamamayan. Hatid nito'y papatinding pagsasamantala at pang-aapi sa mamamayan ng mga mandarambong na malalaking dayuhan at lokal na kapitalista, asendero at burukratang kapitalista. Wala itong ibang idudulot sa mamamayan kundi ibayong kahirapan at panunupil.

Bukod sa mas matatayog at lalong di kapani-paniwalang mga pangako, ang 10-puntong programa ni Arroyo ay walang pinag-iba sa dati nang hungkag na mga pangakong binitawan niya sa kanyang *state of the nation address* noong Hulyo 2003. Alinman doo'y walang natupad. Tiyak na wala ring maaasahan mula sa mga bago niyang deklarasyon.

Patuloy ang malawakang pagkawasak ng mga produktibong pwersa at pagkabagsak ng produksyon. Inaasahang aabot sa P200 bilyon ang depisit sa badyet. Patuloy na lumalaki ang depisit sa kalakalan, ang gahiganteng utang ng gubyerno at panlabas na

**Mga tampok sa
isyung ito...**

Usapang
pangkapayapaan,
nakakadismaya **PAHINA 3**

Chacha, adyenda ng US
PAHINA 4

Ka Argie:
Mandirigmang medik
PAHINA 8

Mga instruksyon sa paglilimbag

1. Ang **pahina 13**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa panugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa angbayan@yahoo.com